

Tgi survegn il post da Corina Casanova?

Retschertga tar ils schefs da fracziun

DA CLAUDIA CADRUVI / ANR

■ Per il mument èsi murquiert appartegnent la successiun per la chanceliera federala. Personal adattà dessi detgavunda. Forsa survegn quella partida il post che tira la curta tar l'elecziun dal cussegl federal. Ils 9 da december elegia il parlament la nova scheffa u il nov schef per la chanzlia federala. Quai succeda immediat sunter la tscherna dal cussegl federal. Las partidas pon far propostas tgi ch'ellas giavischan sco successur per *Corina Casanova*. Fin uss na datti nagins candidats uffizials malgrà ch'il personal fiss avant maun.

L'anr ha discurrì cun ils schefs da fracziun. Nums na laschan els betg rabbitschar ord bucca. Schizunt cun statements generals èn els fitg precauts. Ins veglia decider davart candidaturas sunter las elecziuns naziunalas dals 18 d'october, hai num tar ils blers.

Dumonda tactica

I saja bain pussaivel ch'ins cumbineschia la successiun per Casanova cun l'elecziun dal cussegl federal, di *Rosmarie Quadranti*. Tge partidas che nizzegian il post per tactics na vul la scheffa da fracziun da la pbd dentant betg specular. «I na vegn betg ad esser simpel da chattar ina successiun. La chanceliera ha prestà fitg buna lavur. Da daventar sia successura vegn ad esser ina sfida.»

Quadranti descriva il profil necessari per il post. «I sto esser ina persuna che pensa a moda complessiva (vernetzt), ina persuna comunicativa che tgira e mantegna contacts sur ils cunfins da partida e che chapescha da radunar umans.»



La chanceliera federala prepara e prenda part da las sesidas dal cussegl federal ed ademplitscha uschia in uffizi da gronda responsablad e da grond prestige.

KEYSTONE

Betg in otgavel cusseglier federal

«Nus na tegnain nagut dal nimbus d'in otgavel cusseglier federal», di *Adrian Amstutz* da la pps. Era sche questa espressiun vegnia adina puspè duvrada haja il chancelier in'otra funcziun. «Nus n'avain anc betg decidì tgi purtar. Perquai na pudain nus era betg infurmar.» Il post stoppia vegnir occupà cun ina persuna neutrala.

Da tge partida ch'in candidat vegnia n'emportia betg tant, di il schef da fracziun da la pps. La cursa fetschia quella persuna che possedia la distanza duida tar tutas partidas. Ins stoppia eleger ina

persuna che saja abla da tractar tuts cussegliers federals tuttina e che na stettia betg pli datiers ad in cusseglier federal che a tschels.

Inschign d'intermediar e da manar

Dat il parlament il post a quella partida che ha stuì succumber tar l'elecziun dal cussegl federal? «Dad ina vart han ins gia fatg glieu. Quai n'è betg dal tut fallà», di *Andy Tschümperlin* da la ps. Da l'otra vart stoppian ins eleger ina persuna capavla. Experienceschas en chasa federala sajan d'avantatg. En la ps dettia quai tar las persunas.

«Insatgi che dastga u sto lavurar ensem cun set cussegliers federals sto savair intermediar. E tuttina dovra el in bun inschign da manar», di il schef da fracziun da la ps. Ils dus elements na sajan betg incumpatibels. Ils set cussegliers federals che possedian mintgin entiras brigadas da cussegliaders dovri- an en tscherts muments insatgi che als mainia e tegnia urden.

Dumonda delicata en la pld

«Jau na dun naginas infurmaziun», di la scheffa da fracziun da la pld *Gabi Huber*. I na saja betg il dretg mument

da discurren da la tematica. Gnanca in statement general vul la scheffa da fracziun dar. Quai mussa quant delicata che la dumonda è entaifer sia partida. La pld posseda pliras personalitads cun fitg buns aspects per il post.

Ils verd-liberals na vegnian betg a proponer in agen candidat, di lur scheffa da fracziun *Tiana Angelina Moser*. «Da la grondezza ennà n'è nosa partida betg sin il stgalim per in tal post.» L'emprim less sia partida inagiada vegnir resguardada tar il presidi dal cussegl naziunal.

«Nus avain dumandà entaifer la partida», di *Balthasar Glättli* dals verds. «Ma fin uss n'è nagin s'annunzià. Quai pudess anc sa midar.» El saja pir quatter onns en il parlament e n'enconuschia betg tuts rampins. Ch'ina partida survegnia il post da chancelier sco uschenumnà «Trostpflaster» po el s'imaginar fitg bain. Gliez saja gea era stà il cas sunter che la pcd haja pers ses segund sez en il cussegl federal.

Nums che curseschan

Era sche las fracziuns n'han lantschà nagins candidats uffizials curseschan tscherts nums. Bunas schanzas possedan per exempel ils dus vicechanceliers *André Simonazzi* (ps) e *Thomas Helbling* (pld). Il 2007 aveva la pps purtà *Nathalie Falcone* dal stab en il departament d'economia. La pld aveva purtà *Markus Seiler* ch'è daventà sunter director dal servetsch d'infurmaziun strategic.

Auters candidats fissan *Philippe Schwab* (pld), secretari general da l'assemblea federala, e sia substituta *Martina Buol* (ps).